



Йудан бичсн бичг

Нүр үг

Йуда эврэннь бичгтэн бийэн иткдг улст тоолжах деми багшнрас умшачнран саглжана. Эн ахрхн бичг учр-утхарн Пётрин илгэсн хойрдгч бичгин бөөдлтэ болж медгднэ. Бурхн эврэннь улстан нег дэж болн мөнкинд иткл өгч. Тер итклин төлө ноолдх кергтэ гиж автор урмд өгчэнэ.

Учр-утхин зура

Нүр үг 1–2
Деми багшнрин заң-бэрц,
номин болн терүг бурушалһна тускар 3–16
Иткл хадһлх дуудвр 17–23
Йөрөл 24–25

Мендлһн

1 Би, Йуда, Исус Христосин зарц, Яковин дү, Бурхн Эцкэр дуудгдсн, хөөрлгдсн, Исус Христосар хадһлгддг таднд бичжэ-нэв. ²Бурхн өршөлһэн, амулң жирһлэн болн хөөрлтэн таднд элвгэр өгтхэ!

Худл ном заадг багшнрин тускар

³Күндтэ үүрмүд мини! Маднд өггдсн аврһна тускар би таднд бичхэр икэр седвэртэ билэв. Зуг ода Бурхна улст оньдиндэн да-алһгдсн итклиг харстн гиж таднд урмд өгх кергтэһинь тоолад бичжэнэв. ⁴Яһад гихлэ, Бурхиг сонсдо зэрм улс тадн заагт медмжэн угаһар орсн бөөнэ. Эдн аля, бузр йовдлан кехд бий-дэн зөв өгхэр Мана Бурхна хөөрлтин туск номиг хажилһнэ. Эн улс мана ор һанцхн Нойн болн Деед Эзн Исус Христост иткдго

улс. Эдн цаажла хархх гиж Бурхна Бичгт эднэ тускар кезэнэс авн бичэтэ бээнэ. ⁵Деед Эзн Египетэс Эврэннь келн-улсан хархж аврла. Зуг эс иткдг улсиг хөөннь уга кеж. Тадн энүнэ тускар цуһар меддг болвчн тодлтха гиж келжэнэв. ⁶Бурхна өгсн сэн чинриг юмнд тооллго, бээсн орман үлдэсн Бурхна элчнрин тускар бас тодлтн. Бурхн эдниг мөнк цевэр күлж алдр өдр күртл таг харһуд бэржэнэ. Тер өдрт тедн цаажлгдх. ⁷Содом, Гомора болн өөрк балһсдын залус эн элчнрлэ эдл аля йовдл кеһэд, нег-негнлэһэн унтсн учрас мөнк һалар цаажлгдсмн. Энүг бас тодлтн. Эн эмтнд саглһна үлгүр болжана. ⁸Тедү мет эн улс онц зүүд зүүдлэд, цогцан буздаһад, Бурхна йосиг холад, Бурхна элчнриг му келнэ. ⁹Бурхна ах элч Михаил бийнь чигн эрлгтэ марһдад, Мошен цогцин тускар зүткжэсн цагт терүг му келх, гемшэх зөв бийдэн өгсн уга. Тер:

– Деед Эзн Бийнь чамаг хөртхэ! – гиж келсн билэ.

¹⁰Эн улс эврэн чигн эс меддго юмиг му келжэнэ. Эдн ухан уга малмуд кевтөһөр төрхэрэ медсн йовдл харһна. Эн йовдл-мудар бийэн үрэнэ. ¹¹Эдн басл зовлнган эдлх. Яһад гихлэ, эдн Кэнлэ эдл бээнэ. Икэр байжхар седэд, Баламла эдл хажһр йовдл кеһэд, Корла эдл буцад үкцхэх. ¹²Тиим улс тана хуртг хот эдлсн цагт ичр угаһар икэр хот идэд, хар толвс* мет тадниг буздана. Эдн эврэннь арһан хээнэ. Эн улс салькнд көөгдсн хур асхдго үүлн мет. Эдн намрт темс өдгго модд мет. Эн модд унгарнь сунһад таслгдсн учрас кевтэн хагсж одж. ¹³Далан дольган көөрсн мет эдн олна нүднд ичр уга йовдл харһжана. Эдн хажисн одд мет. Бурхн эднд таг харһуд бөөдг мөнк орм белдж**. ¹⁴Аадмин зурһадгч үйд бээсн Ханок эднэ тускар иигж ээлдж:

– Хэлэтн! Бурхна миңһн, миңһн элчнртэ Деед Эзн йовж йовна. ¹⁵Учрнь эн: Орчлнгин эмтнэ зарһинь кех, Бурхиг соңсдго улсиг хар йовдл кеснэс көлтэ, Терүнэ өмнэс хорта үг келснэс көлтэ Тер цаажлх. ¹⁶Эн улс Бурхна өмнэс үг келэд оньдин хүвдэн өөлнэ. Бийдэн олз авхар талдан улст зуһудна, дэкэд болхла көөрнэ. Эврэннь хар сансн санаһан оньдин күцэнэ.

* *Толвс* – пятна.

** Далан болн хажисн одд гиснь Бурхна өмнэс буцлт өргсн улс.

Саглын болн зокалмуд

¹⁷Зуг тадн, хээртэ үүрмүд мини! Деед Эзн Исус Христосин апостолмудын урдын келсиг бичэ мартгн. ¹⁸Тедн иигж келсн бөөнө: Сүл цагт эврәннь хар сансн санахан күцэдг, таднар наад бөрдг улс нарч ирх. ¹⁹Эн улс иткдг улсиг баг-багар салх. Эдн төрхэрэ бөөсн му седвөртэн авлгада, Бурхна Сөкүсн угаһар бөөнө. ²⁰Болв тадн, хээртэ үүрмүд мини! Хамгин эрүн итклэн олзлад, нег-негэн сурһтн. Эрүн Сөкүснэ күчэр зальвртн. ²¹Бурхн таднд хээртэ болдгиг улм гүүнэр медж йовтн. Мана Деед Эзн Исус Христос эврәннь хээртэр таднд мөнк жирһл өгхиг күлэтн. ²²Итклдэн маһддг улсла өршөңгү бээтн. ²³Зэрмнь һалас һарһж авртн. Зэрмстнь цаһан санахан күргтн, зуг бийән саглтн. Эднэ килнцтэ седвэрмүдэр бузрдсн хувцнднь дурго болтн. ²⁴⁻²⁵Ор һанцхн Бурхн Мана Аврач килнцэс эрвлж, Эврәннь туурмжин өмн тадниг буру уга бөөдлтэ байр өгч зогсах арһта. Исус Христосар дамжад, эмтн Бурхиг магтад күндлтхә! Эклцэс авн өдгэ цагт болн мөнкиндән Бурхн хамгин күчтэ болн йоста болдгиг эмтн медтхә! Тиигтхә!

Йудан бичгиг Шин Бооцан
дегтрин 331 халхд тэвж умштн